

MOCIÓN DE SOMOS CAMBADOS PARA QUE AS REDEIRAS SE LLE RECOÑEZA O COEFICIENTE REDUCTOR

Constantino Cordal Rodríguez, con DI 35.452.897-F, concelleiro do Ilmo. Concello de Cambados, en base ao disposto nos artigos 91.4 e 97.3 do Regulamento de Organización, Funcionamento e Réxime Xurídico das entidades locais e demais normativa que poida resultar de aplicación, presenta, diante do Pleno da Corporación esta moción, en base á seguinte

EXPOSICIÓN DE MOTIVOS

Segundo puxo de manifesto o colectivo de redeiras, a Dirección Xeral de Ordenación da Seguridade Social négase a autorizar o inicio do procedemento para o recoñecemento dos coeficientes reductores ante a falta de casos de mortalidade neste colectivo profesional.

Recentemente a Federación Galega de Redeiras Artesanais de Galicia “O Peirao” mostrou a súa indignación e estupor ante a resposta dada polo director xeral de Ordenación da Seguridade Social, Francisco Borja Suárez Corujo, que denega a posibilidade de iniciar o procedemento para tramitar o coeficiente reductor para este colectivo, “*ante a falta de indicios de elevados incrementos nas taxas de mortalidade e morbilidade debido á realización de devandito traballo*”.

Nunha resolución asinada o 22 de marzo, o director xeral de Ordenación da Seguridade Social desestimou a solicitude presentada pola Federación Galega de Redeiras Artesanais “O Peirao” en agosto de 2018 aducindo que esta Federación non é ademais unha entidade representativa dos intereses do colectivo de redeiras.

O documento da Seguridade Social mostra un descoñecemento absoluto do colectivo de redeiras, integrado practicamente no 100% por mulleres que ven diminuída a súa capacidade para desenvolver a súa profesión ata os 67 anos, debido á dureza da mesma, polo que se fai precisa unha redución na idade de xubilación destas profesionais.

As redeiras son o único subsector da pesca ao que aínda non se lle recoñeceu o coeficiente reductor e esta circunstancia constitúe unha desigualdade de xénero con respecto aos homes que desenvolven as mesmas tarefas e que si teñen recoñecida esta diminución na idade de xubilación. Xa que teñen a posibilidade de darse de alta como mariñeiros ou outras ocupacións da pesca que lles permiten beneficiarse dos coeficientes reductores aínda que logo fagan reparación de redes, mentres que as mulleres redeiras non poden facelo.

A resolución ditada pola Dirección Xeral de Ordenación da Seguridade Social contradí ademais un informe de febreiro de 2014 do pleno do Parlamento Europeo que instaba á

Comisión e ao Consello a que reclamasen aos Estados membros para que aplicasen coeficientes redutores para anticipar a idade de xubilación.

Ademais, o propio Ministerio de Agricultura, Pesca e Alimentación conclúe no estudo titulado "Redeiras, un oficio descoñecido", que é preciso facilitar a redución da idade de xubilación entre as profesionais deste colectivo.

Dende Somos Cambados, lamentamos o descoñecemento total e absoluto por parte dos responsables de Seguridade Social que non saben que as redeiras traballan con redes quilométricas molladas que supoñen pesos que multiplican varias veces o das traballadoras, e que están sometidas ás inclemencias do tempo, chovendo ás veces en portos no inverno e soportando temperaturas moi elevadas no verán, o que está incidindo na aparición de enfermidades da pel como o cancro de pel, iso sen esquecer a humidade continua e a insalubridade derivada dos traballos de reciclaxe que fan, xa que o mar é un depósito de lixo, as redes que se recollen veñen cheas de materiais en descomposición que provocan, entre outras doenzas, infeccións oculares e alerxias.

Os coeficientes redutores supoñen un adiamento na idade de xubilación e benefíciáanse deles os traballadores da minería, aéreos, ferroviarios, artistas, profesionais taurinos, bombeiros, policía da Ertzaintza, policía locais e traballadores do sector da pesca. Concretamente, deste último, as redeiras son as únicas profesionais que aínda non contan cos coeficientes.

Por todo o exposto anteriormente, o grupo municipal de Somos Cambados

ACORDA:

Instar ao Pleno do concello de Cambados a aprobar os seguintes acordos:

- **Instar a que o Director Xeral de Ordenación da Seguridade Social visite as distintas localizacións onde traballan as redeiras para así coñecer in situ as condicións nas que desenvolven a súa profesión.**
- **Instar a que a Dirección Xeral de Ordenación da Seguridade Social inicie de oficio o procedemento para o recoñecemento dos coeficientes redutores das Redeiras.**
- **Que se lle de traslado do presente acordo a Dirección Xeral de Ordenación da Seguridade Social, e a Federación Galega de Redeiras Artesáns "O Peirao"**

Cambados, 9 de abril de 2019. Tino Cordal Rodríguez, Concelleiro de Somos Cambados.